

حدوتة عربية

زهقت كتابة عن غزة
وعن بغداد وعن بيروت
سيناريو واقصه عايشنها
في دنيا كلها جبروت

هاسيبني م الكلام ع الدم
وشيل الهم ويا الهم
وقرش تملي اقوله ياسيد
ولو وصلت هاقوله ياعم

طب سيبك م الكلام واسمعي

حكاية جائر يوم تنفني

بتحكي عن انسان غلبان

عمره ما خان ولا يوم بعني

حكاية راجل اسمه حسين

ساكن في خيمة في دير ياسين

كل العجايب هاتشوفها

بس او عي تسأل أقصد مين

عم حسين دا كان راجل

تملي البسمة جوي عنية

بيكرم أهله وجيرانه

ورب العرش راضي عليه

قاعد في ليلة شتا
خبط عليه الباب
فتح أتاريه ضيف
وبايته م الاغراب

جهز قوام العشا
من خيرة الرحمن
وقاله كل بالهنا
وصلي ع العدنان

أكل بسرعه الضيف
من خشي ولا خوف
شمر ايديه الاتنين
كان شكله غير مألوف

خلص ياناس ع العشا
ولا قال متشكرين
وعم حسين يقوله
هاجيبك مرتين

فكر بسرعه الضيف
وقال ودي حيلة
تسمح لي يا ابو الكرم
نيمني لو ليلة

قبل ياناس البطل
وقال يارب تسترني
وأقدر علي دا العمل
ويارب توجرني

وف تاني ليلة الباب خبط
وعم حسين راح يتظبط
جري قوام ع الباب يفتح
ضيوف كثير وبتتنطط

دلوقتي بقي مش لاقى مكان
لاله لابيت بقي ولا دكان
البيت خلاص بقي كله ضيوف
بيخططوا لطرده الغلبان

احتلوا بيته وقالوا مفيش
مكان تنام ولا تاكل عيش
خليك بعيد عنا وماتجيش
أصل إحنا بيتنا دا مليون جيش

دلوقتي قالوا البيت بيتنا
وانت غريب وف حنتنا
لاتقول دقيقتنا ولا زيتنا
اخرج بقي وياله فارقتنا

صرخ وقال أه يا اخواني
مصري وسوري ولبناني
عراقي ليبي وسوداني
ساييني لية وسط احزاني

افهم ياعم حسين واسمع
عمر الدموع والله ماتنفع
فكر بجد هاتعمل اية
وازاي بلادك راح ترجع